

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalakkersuisut Kalaallit Nunaanni motorcykelinik eqqussinissamik sananissamillu inerteqquteqarneq pillugu Kalaallit Nunaannut inatsit nr. 186, 14. maaji 1980-imeersoq atorunnaarsinneqarnissaa pillugu Folketingimi inatsisissatut siunnersuummik saqqummiussisoqarnissaa anguniarlugu naalagaaffimmi oqartussaasunut saaffiginninnissamut peqquneqarnissaa pillugu Inatsisartut aalajangiiffigisassaattut siunnersuut. Saaffiginnissuteqarnermi aamma tamanna pissutigalugu Kalaallit Nunaannut maleruagassani pisariaqartunik allannguuteqartoqarnissaa anguniarneqassaaq.

(Inatsisartunut ilaasortaq Pele Broberg, Naleraq)

Tunngavilersuut:

Isumaqarpunga Kalaallit Nunaanni motorcykelinik eqqussinissamut sananissamullu inerteqqut atorunnaarsinneqartariaqtoq.

Inerteqqut Kalaallit Nunaanni motorcykelinik eqqussinissamik sananissamillu inerteqquteqarneq pillugu Kalaallit Nunaannut inatsimmi nr. 186-imi, 14. maaji 1980-imeersumi aalajangersagaavoq. Inatsit 1. juuli 1980-imi atuutilerpoq, sulilu atuulluni. Naalagaaffimmit inatsisiliaammat Inatsisartunit kisimi atorunnaarsinneqarsinnaanngilaq.

Taamaattumik inatsit atorunnaarsinneqarnissaa pillugu Folketingimi inatsisissatut siunnersuummik saqqummiussisoqarnissaa anguniarlugu Naalakkersuisut naalagaaffimmi oqartussaasunut saaffiginnittariaqput.

Kalaallit Nunaat 1980-imiilli allanngorujussuarpoq. Illoqarfinni arlalinni aqquserngit pitsaanerulersimapput. Motorcykelit akisussaassuseqartumik maleruagassallu ersarissut malillugit atorneqarsinnaappata, innuttaasut angallatit sorliit atorusunnerlugit tunngaviusumik namminnek toqqarsinnaasariaqput.

Inerteqqutip atorunnaarsinneqarnera isumaqanngilaq motorcykelit sumi tamani ukioq kaajallallugu atorneqarsinnaalissasut. Sila, aqquserngit qanoq innerat sumiiffinnilu pissutsit sulil killiliissapput. Motorcykelilli atorneqarsinnaanerangit naalagaaffimmi angallannermut isumannaallisaanermullu maleruagassatigut aalajangersarneqartariaqarpoq, tamanut atuuttumik eqqussinermut sananermullu inerteqquteqarnikkut pinnani.

Kalaallit Nunaannut maleruagassat atuuttut arlallit motorcykelinik maanna taaneqartitsereerput, ilaatigut aqqusinikkut angallannermut qamutillu motoorillit akileraarutaat pillugit maleruagassat. Inerteqqut atorunnaarsinneqarpat nalunaarsuinermut, biilersinnaanermut allagartamut, teknikkikkut piumasaqaatinut, sillimmasiinermut, isumannaallisaanermut atortunut akitsuutinullu maleruagassat sorliit allanngortinneqassanersut ilaneqassanersulluunniit misissorneqassaaq.

Isumaqarpunga angallatit sorliit nunatsinni atorneqarsinnaassanersut Kalaallit Nunaata nammineq aalajangiiffigisinnaasariaqarai. 1980-imiilli tamanut atuuttumik inerteqqut taamaallaat sivisuumik atuussimanera pissutigalugu ingerlaannartariaqanngilaq.

Pisortanut aningaasatigut allaffissornikkullu kingunerisassai

Naalakkersuisut naalagaaffimmi oqartussaasunut saaffiginninnerat, maleruagassanik atuuttunik misissuinissaq kiisalu Namminersorlutik Oqartussat akisussaaffeqarfiini allannguutinik pisariaqartunik suliaqarneq AC-tut atorfillip ukiumut sulinerata nalinga ataaseq tikillugu pisariaqartitsisinnaasoq, tassa 500.000 kr.-it missaannik aningaasartuuteqartoqarsinnaasoq, missingerneqarpoq. Naalagaaffimmi oqartussaasut allaffissornikkut aningaasartuutissaat missingersuummi ilanngunneqanngillat.

Inerteqqutip atorunnaarsinneqarnera qamutit motorillit akileraarutaannit akiliutinilluunniit allanit Nunatta Karsianut isertitaqarnerulersitsisinnaavoq. Peqatigisaanik nalunaarsuinnermut, nakkutilliinnermut aqqusinikkullu angallannermi isumannaallisaanermut ingerlaavartumik aningaasartuuteqartoqarsinnaavoq. Motorcykelit qanoq amerlatigisut atorneqalissanersut, maleruagassat inaarutaasumik qanoq ilusilerneqassanersut allaffissornikkullu suliaasat qanoq annertutigissanersut ilisimaneqanngimmata, aningaasatigut sunniut ataatsimut maanna naatsorsorneqarsinnaanngilaq.

Namminersorlutik inuussutissarsiortunut aningaasatigut allaffissornikkullu kingunerisassai

Eqqussuisut, tuniniaasut, iluarsaassisarfiit, biilernerimik ilinniartitsiviit sillimmasiisarfiillu nutaanik inuussutissarsiornikkut periarfissaqalersinnaapput. Peqatigisaanik ilaatigut nalunaarsuinnermut, isumannaallisaanermut, teknikkikkut piumasaqaatinut sillimmasiinnermullu maleruagassat malittussaassavaat. Niuerfiup annertussusissaa aqquserngit, sila piumaneqarnerlu apeqqutaaffigissavai.

Innuttaasunut aningaasatigut allaffissornikkullu kingunerisassai

Motorcykelimik pisinissaq nammineq aalajangigassaassaaq. Innuttaasunut ilaannut motorcykeli biilimit pisinermi ingerlatsinermilu akikinnerusinnaavoq, taamaattorli angallat, atortut, nalunaarsuineq, akileraarut, sillimmasiineq pisariaqarpallu biilersinnaanermut allagartaq aningaasartuutaassapput.

Innuttaasunut aningaasatigut sunniut ataatsimut maanna naatsorsorneqarsinnaanngilaq. Sunniut maleruagassat inaarutaasumik qanoq ilusilerneqassanersut kiisalu inuit qassit motorcykelimik atuisalissanersut ilaatigut apeqqutaaffigissavaa.